

¡BOMBA!

Si se pagó hartu billete en realidad no es el caso; es saber si con Pegaso espieron hasta el copete



K'untzil

Jueves 10 de julio de 2025

CAMPECHE · YUCATÁN · QUINTANA ROO · AÑO 11 · NÚMERO 2517 · www.lajornadamaya.mx



Probeis, u meyaj AMLO mix juntéen béeychajij

Leonardo Barraza / p 10
Oochel Facebook Promoción del Béisbol en México

“Yaan u yantal to'on najilo'ob xook ichil tuláakal u noj lu'umil México ti'al u ka'ansal wiinik. Ka'alikil u xokik u secundaria, preparatoriae' yaan xan u kaambal-báaxalo'ob (...) máax ku jach beetik tu beele' yaan u p'aatal u báaxt béisbol, máax ma' no'ojan u ti'ale' yaan u ts'o'oksik u xook, yaan u béeytal u kaambal ti'al u beetik u jka'ansajil educación física”, leti'e' ba'ax tu ya'alaj Andrés Manuel López Obrador, yéetel le jach náaynaj ya'abach táankelem paalal ku báaxtiko'ob béisbol ka'ach tu kaajil Cancún, jump'éeel ti' la kaajo'ob yéeya'ab ka'ach ti'al u yantal jump'éeel ti' le najilo'ob xooka', ba'ale' mix juntéen k'uchij.

Láayli' tu ja'abil 2019e', u jala'achil Quintana Roo, jo'olbesa'an ka'ach tumen Carlos Joaquín González, tu kaxtaj ka'aj pakta'ak Cancún ti'al u líik'sa'al jump'éeel u kúuchil Promoción y Desarrollo del Béisbol en México (Probeis). Najil xooke' ti' kun ts'aabil ka'ach tu kúuchil Centro Estatal de Alto Rendimiento (CEDAR) yéetel ti'al u beeta'ale' unaj u k'aabéetkunsal 9 millonesil pesos.

Tu winalil abril 2019e', tu estadioil Beto Ávilae' k'uch táankelemo'ob ichil 11 tak 16 u ja'abil ti'al u ch'úukta'al u báaxalo'ob. Ka'aj ts'o'oke', 92 u túulal yéeya'ab ti' óoxp'éeel categorías: 2002-2004, 2005-2006

yéetel 2007-2008. U mokt'aanile': jump'éeel beca chuka'an ti'al u xo'okol secundaria wa bachillerato, u ka'ansa'al béisbol de profesional, yéetel tu paachil k'iine', u k'ujsa'al máax Liga Mexicana de Béisbol wa tak Grandes Ligas.

Tu k'iinil 15 ti' febrero ti' u ja'abil 2020e', beeta'ab k'a'aytajil tsikbal ti'al u ts'aabal ojéeltbil proyecto. Taakpaj jala'ch te'el k'inako'obe', Joaquín González; u jo'olpóopil noj kaaj ka'achij Mara Lezama Espinosa; Arturo Abreu Marín, máax chíikbesik u jala'achil Méxco tu lu'umil Quintana Roo; Ventura Peinado Bojórquez, máax jo'olbesik u jaats meyajil proyectos Probeis;

yéetel Antonio López Pinzón, máax táan ka'ach u jo'olbesik Comisión para la Juventud y el Deporte tu lu'umil Quintana Roo (Cojudeq). Te'el k'inako' jk'u'ub deportivo nu'ukulo'ob ti' táankelemo'ob, ts'o'oke' k'a'ayta'ab u chúunsal najil xook ti'al u winalil abril ti' u ja'abil 2020.

Ba'ale', u pak'be'en k'oja'anil Covid-19e' tu k'ataj u beel le meyajo'. P'el úuchik u yojéelta'al bix u bin meyaj te'el k'inako'obe', tak ka'aj xu'ulij. Ma' k'aata'ab mix ba'al, mix xan ka' kaxta'ab tsikbal yéetel le paalalo'ob yéeya'ab ka'achij. Kex tumen beey ts'oka'an le kúuchilo', ma' táan u meyaj, mina'an xooki', mix kaambal.